



*ODLUKA O PROVOĐENJU
ELABORATA O MOGUĆIM LOKACIJAMA ZA POSTAVLJANJE
SPOMENIKA, SPOMEN-OBILJEŽJA I SPOMEN-PLOČA NA
PODRUČJU GRADA SARAJEVA, A KOJI SU OD INTERESA ZA GRAD
SARAJEVO
(prijedlog)*

*Predlagač: Gradonačelnik
Obrađivač: Služba za urbano planiranje,
investicije, stambene i komunalne poslove*

Sarajevo, januar 2019. godine



Na osnovu člana 26. stav (1) tačka 2. Statuta Grada Sarajeva („Službene novine Kantona Sarajevo“ broj: 34/08 – prečišćeni tekst), Gradsko vijeće Grada Sarajeva, na sjednici održanoj dana _____, donijelo je

- prijedlog -

**ODLUKA O PROVOĐENJU
ELABORATA O MOGUĆIM LOKACIJAMA ZA POSTAVLJANJE SPOMENIKA,
SPOMEN-OBILJEŽJA I SPOMEN-PLOČA NA PODRUČJU GRADA SARAJEVA, A KOJI
SU OD INTERESA ZA GRAD SARAJEVO**

DIO PRVI - OPĆE ODREDBE

**Član 1.
(Predmet odluke)**

Ovom Odlukom uređuje se primjena Elaborata o mogućim lokacijama za postavljanje spomenika, spomen-obilježja i spomen ploča na području Grada Sarajeva, a koji su od interesa za Grad Sarajevo (u daljem tekstu: Elaborat) čija je izrada i donošenje propisano Odlukom o spomenicima od značaja za Grad Sarajevo („Službene novine Kantona Sarajevo“ broj: 12/11, 21/16, 51/18) (u daljem tekstu: Odluka), kao i provođenje drugih neophodnih aktivnosti koje imaju za cilj određivanje lokacije spomeničkog sadržaja i izgleda idejnog rješenja, a što je sadržaj postupka do donošenja odluke o podizanju spomenika, spomen-obilježja ili spomen ploče koji mogu biti u vidu skulpture, biste, spomen – kompleksa, odnosno obilježja, spomen česme, spomen ploče i fontane koji su svojim sadržajem, estetskim izgledom i funkcionalnošću namijenjeni očuvanju uspomena, historijskih događaja i ličnosti (u daljem tekstu: spomenika).

**DIO DRUGI – INICIJATIVA ZA PODIZANJE SPOMENIKA, PRIMJENA ELABORATA,
ODREĐIVANJE LOKACIJA, IDEJNO RJEŠENJE I ODLUKA O PODIZANJU
SPOMENIKA**

POGLAVLJE I. PODNOŠENJE I VALORIZACIJA INICIJATIVE

**Član 2.
(Podnošenje inicijative)**

- 1) Inicijativa za podizanje spomeničkog sadržaja od značaja za Grad Sarajevo se podnosi gradonačelniku Grada Sarajeva.
- 2) Inicijativu mogu podnijeti gradski vijećnici Grada Sarajeva, općinski vijećnici gradskih općina, gradonačelnik Grada Sarajeva, načelnici gradskih općina, pravna lica i udruženja građana. Pravna lica i udruženja građana mogu podnijeti inicijativu za podizanje spomenika putem gradske općine.
- 3) Inicijativa mora sadržavati naziv događaja, odnosno ime ličnosti u čiji spomen se inicira podizanje spomenika, sa obrazloženjem i prijedlogom lokacije.

Član 3.
(Valorizacija inicijative)

Gradonačelnik inicijativu upućuje Komisiji za spomenike Gradskog vijeća koja vrši valorizaciju događaja, odnosno ličnosti u skladu s članom 2. Odluke, te odlučuje je li događaj, odnosno ličnost u čiji spomen se inicira podizanje spomenika, od značaja za Grad Sarajevo.

Član 4.
(Javna debata o lokaciji)

- 1) Po utvrđenom značaju, Gradonačelnik i podnosioci inicijative moderiraju rad debate
 - kako bi se utvrdilo postojanje, a dalje i važnost veze historijskog događaja ili ličnosti sa lokacijom na kojoj se inicira podizanje spomenika od značaja za Grad Sarajevo u skladu s Odlukom;
 - kako bi se opredijelili o potrebi raspisivanja konkursa radi pribavljanja idejnog rješenja, te
 - da bi razmotrili model finansiranja aktivnosti na pripremi i podizanju spomenika.
- 2) U debati učestvuju subjekti relevantni za tematiku spomenika iz inicijative koja se razmatra, nadležne institucije, akademska zajednica i građani, na poziv gradonačelnika Grada Sarajeva.

POGLAVLJE II. LOKACIJE ZA PODIZANJE SPOMENIKA IZ ELABORATA

Član 5.
(Primjena Elaborata)

Ukoliko se u toku debate ustanovi da je historijsku vezu spomenika sa lokacijom na kojoj se inicira podizanje spomenika, teško ustanoviti ili ona nije izričito važna, razmatraju se lokacije za podizanje spomenika utvrđene u Elaboratu, prioritarno sa prostornog i urbanističkog aspekta.

Član 6.
(Spomenici od značaja za Grad Sarajevo i Bosnu i Hercegovinu)

- 1) Gradonačelnik Grada Sarajeva i Komisija za spomenike Gradskog vijeća, u primjeni Elaborata, imaju nadležnost da razmatraju i odabiru lokaciju za koju je u „Ličnoj karti spomenika“, u rubrici „Lokacije“, stavljena oznaka „Bosna i Hercegovina“.
- 2) Na lokaciji iz stava 1. ovog člana, mogu se podizati spomenici koji se odnose na događaje, odnosno ličnosti od značaja za Grad Sarajevo i Bosnu i Hercegovinu, u skladu s kriterijima iz Odluke, a koji se trebaju podići u glavnom gradu države.
- 3) Obavezno je raspisivanje javnog konkursa kako bi se za svaku lokaciju iz stava 1. ovog člana, postiglo primjereno spomeničko ili skulpturalno rješenje, uz analizu specifičnih urbanističko-arhitektonskih elemenata i okruženja.

Član 7.
(Spomenici od značaja za Grad Sarajevo)

- 1) Gradonačelnik Grada Sarajeva i Komisija za spomenike Gradskog vijeća, u primjeni Elaborata, imaju nadležnost da razmatraju i odabiru lokaciju za koju je u „Ličnoj karti spomenika“, u rubrici „Lokacije“, stavljena oznaka „Grad Sarajevo“.
- 2) Na lokaciji iz stava 1. ovog člana, može se podizati samo spomenik koji se odnosi na događaje i ličnosti od značaja za Grad Sarajevo, u skladu s kriterijima iz Odluke.
- 3) Idejno rješenje spomenika koji se podiže na lokaciji iz stava 1. ovog člana, mora biti usklađeno sa urbanističko-arhitektonskim okruženjem.

Član 8.
(Spomenici od značaja za gradske općine)

- 4) Općina koja je u sastavu Grada Sarajeva, u primjeni Elaborata ima mogućnost izbora lokacije kojoj je u „Ličnoj karti spomenika“, u rubrici „Lokacije“, stavljena oznaka „općina“, a koje se nalaze na teritoriju općine koja podiže spomenik.

POGLAVLJE III. LOKACIJA ZA PODIZANJE SPOMENIKA KOJA NIJE SADRŽANA U ELABORATU

Član 9.
(Spomenici od značaja za Grad Sarajevo i Bosnu i Hercegovinu)

- 1) Ukoliko se ustanovi da je bitna veza spomenika sa lokacijom na kojoj se inicira podizanje spomenika, a koja nije predviđena u Elaboratu, gradonačelnik Grada Sarajeva putem nadležne gradske službe, traži mišljenje o mogućnosti postavljanja spomenika na tako predloženoj lokaciji.
- 2) Gradonačelnik Grada Sarajeva pribavlja mišljenje općine na čijoj teritoriji se nalazi lokacija, mišljenje Kantonalnog zavoda za zaštitu kulturno-historijskog i prirodnog naslijeđa, mišljenje Zavoda za planiranje razvoja Kantona Sarajevo, a u slučaju da se lokacija nalazi u zoni zaštite nacionalnog spomenika i mišljenje Zavoda za zaštitu spomenika Federacije Bosne i Hercegovine.

Član 10.
(Spomenici od značaja za općinu)

U slučaju podizanja spomenika od značaja za općinu na lokaciji koja Elaboratom nije predviđena za postavljanje spomenika, pribavlja se mišljenja Kantonalnog zavoda za zaštitu kulturno-historijskog i prirodnog naslijeđa, Zavoda za planiranje razvoja Kantona Sarajevo, a u slučaju da se inicira podizanje spomenika na lokaciji koja se nalazi u zoni zaštite nacionalnog spomenika, neophodno je i mišljenje Zavoda za zaštitu spomenika Federacije Bosne i Hercegovine.

POGLAVLJE IV. IDEJNO RJEŠENJE ZA PODIZANJE SPOMENIKA

Član 11.
(Idejno rješenje za spomenike od značaja za Grad Sarajevo i Bosnu i Hercegovinu)

- 1) Po određivanju lokacije za podizanje određenog spomenika od značaja za Grada Sarajevo i Bosnu i Hercegovinu, gradonačelnik Grada Sarajeva raspisuje konkurs za izbor odgovarajućeg idejnog rješenja spomenika.
- 2) Gradonačelnik Grada Sarajeva projektni zadatak za izradu idejnog rješenja spomenika formulira u suradnji sa Zavodom za planiranje razvoja Kantona Sarajevo.
- 3) Gradonačelnik Grada Sarajeva formira konkursnu komisiju koju čine predstavnik podnosioca inicijative, pomoćnik gradonačelnika Grada Sarajeva koji rukovodi nadležnom službom za uparavu, te ovisno o vrsti spomenika, predstavnici Akademije likovnih umjetnosti ili udruženja ULUBIH i ULUPUBIH, Arhitektonskog fakulteta u Sarajevu ili Asocijacije arhitekata BiH, Zavoda za zaštitu kulturno-historijskog i prirodnog naslijeđa Kantona Sarajevo, Zavoda za planiranje razvoja Kantona Sarajevo, predstavnici institucija i/ili pojedinaca relevantnih za tematiku spomenika.
- 4) Rješenjem o formiranju konkursne komisije imenuju se članovi komisije, utvrđuje djelokrug komisije, uz obavezu donošenja poslovnika o radu komisije, te se utvrđuje visina naknade za

rad članovima komisije, tako da pravo na naknadu ostvaruju svi članovi komisije, osim predstavnika Grada Sarajeva i prestavnika podnosioca inicijative.

- 5) Konkursna komisija razmatra pristigle prijave na konkurs i predlaže gradonačelniku Grada Sarajeva rang listu razmatranih idejnih rješenja.
- 6) O konačnom izboru idejnog rješenja odlučuje gradonačelnik Grada Sarajeva.

Član 12.

(Idejno rješenje za spomenike od značaja za Grad Sarajevo)

- 1) Po određivanju lokacije za podizanje određenog spomenika od značaja za Grad Sarajevo, gradonačelnik Grada Sarajeva, uz konsultacije sa nadležnim institucijama i podnosiocem inicijative, ili putem javnog, odnosno pozivnog konkursa, pribavlja odgovarajuće idejno rješenja spomenika.
- 2) Ukoliko se idejno rješenje pribavlja putem konkursa, formira se konkursna komisija na način kao što je navedeno u članu 11. ove Odluke.

Član 13.

(Idejno rješenje za spomenike od značaja za općine Grada Sarajeva)

- 1) Po određivanju lokacije za podizanje određenog spomenika od značaja za općinu, općina zajedno sa podnosiocem inicijative pribavlja idejno rješenje, moguće uz raspisivanje javnog ili pozivnog konkursa za izbor odgovarajućeg idejnog rješenja spomenika.
- 2) Za spomenik za koji se inicira podizanje na lokaciji predviđenoj Elaboratom sa oznakom „općina“ ili na lokaciji odabranoj u konsultacijama sa nadležnim institucijama, općina pribavlja mišljenje o idejnom rješenju spomenika od Zavoda za zaštitu kulturno-historijskog i prirodnog naslijeđa Kantona Sarajevo i Zavoda za planiranje razvoja Kantona Sarajevo.

Član 14.

(Spomen – ploča)

Ukoliko na traženoj lokaciji ne postoje prostorne mogućnosti za postavljanje slobodnostojećeg trodimenzionalnog spomenika, a veza spomenika sa lokacijom je bitna, o mogućnosti postavljanja spomenika u vidu odgovarajuće spomen-ploče, na fasadu arhitektonskih objekata na traženoj lokaciji, gradonačelnik Grada Sarajeva pribavlja mišljenje općine na čijoj teritoriji se nalazi lokacija, Zavoda za zaštitu kulturno-historijskog i prirodnog naslijeđa Kantona Sarajevo i Zavoda za planiranje razvoja Kantona Sarajevo, te Zavoda za zaštitu spomenika Federacije Bosne i Hercegovine u skladu sa zakonom.

POGLAVLJE IV. ODLUKA O PODIZANJU SPOMENIKA

Član 15.

(Priprema odluke o podizanju spomenika)

Po završenom postupku razmatranja inicijative u pogledu preciziranja lokacije i pribavljanja idejnog rješenja, gradonačelnik Grada Sarajeva upućuje Komisiji za spomenike Gradskog vijeća na dalje postupanje, tekst odluke o podizanju konkretnog spomenika tako da tekst odluke obavezno sadrži idejno rješenje spomenika, precizno određenu mikro lokaciju za podizanje spomenika, podatke o načinu finansiranja i rok za poduzimanje Odlukom propisanih aktivnosti, na podizanju spomenika, te podatke o nosiocu realizacije.

Član 16.
(Donošenje odluke o podizanju spomenika)

- 1) Komisiji za spomenike Gradskog vijeća, na osnovu predloženog teksta odluke o podizanju spomenika iz člana 15. ove odluke, utvrđuje nacrt odluke i upućuje ga Gradskom vijeću na razmatranje, a poslije provedene javne rasprave, prema tekstu prijedloga odluke koji priprema gradonačelnik Grada Sarajeva, Komisija za spomenike utvrđuje prijedlog odluke i upućuje ga Gradskom vijeću na konačno odlučivanje.

Član 17.
(Primjena odluke o podizanju spomenika)

- 1) Podnosilac inicijative dužan je, po stupanju na snagu odluke o podizanju konkretnog spomenika od značaja za Grad Sarajevo, podnijeti zahtjev za izdavanje urbanističke saglasnosti za podizanje spomenika, nadležnom općinskom organu, najkasnije u roku od 60 dana i o tome istovremeno obavijesti gradonačelnika Grada Sarajeva.
- 2) Ukoliko podnosilac inicijative ne izvrši obavezu navedenu u stavu 1. ovog člana, gradonačelnik Grada Sarajeva pokreće prema Gradskom vijeću proceduru stavljanja van snage odluke Gradskog vijeća o podizanju spomenika od značaja za Grad Sarajevo za čiju realizaciju podnosilac inicijative nije poduzeo odlukom propisane aktivnosti u propisanom roku navedenom u stavu 1. ovog člana.

DIO TREĆI – ZAVRŠNE ODREDBE

Član 17.
(Stupanje na snagu)

Ova Odluka stupa na snagu osmog dana od dana objavljivanja u „Službenim novinama Kantona Sarajevo“.

Broj:
Sarajevo,

PREDSJEDAVALJUĆI GRADSKOG VIJEĆA

Dr. Igor Gavrić

PRAVNI OSNOV:

Pravni osnov za donošenje ove Odluke sadržan je u odredbama član 26. stav (1) tačka 2) Statuta Grada Sarajeva („Službene novine Kantona Sarajevo“, broj: 34/08 – prečišćeni tekst) kojim je propisano da Gradsko vijeće donosi odluke, druge propise i opće akte i daje njihovo tumačenje.

RAZLOZI DONOŠENJA:

Programom rada Gradskog vijeća Grada Sarajeva za 2019. godinu planirano je razmatranje „Odluke o provođenju Elaborata o mogućim lokacijama za postavljanje spomenika, spomen-obilježja i spomen-ploča na području Grada Sarajeva, a koji su od interesa za Grad Sarajevo“.

Također, članom 4. Odluke o spomenicima od značaja za Grad Sarajevo („Službene novine Kantona Sarajevo“ broj: 12/11, 21/16, 51/18), predviđeno je da se podizanje spomenika vrši u skladu sa Elaboratom o mogućim lokacijama za postavljanje spomenika, spomen-obilježja i spomen-ploča na području Grada Sarajeva, a koji su od značaja za Grad Sarajevo.

Elaborat je usvojen na sjednici Gradskog vijeća Grada Sarajeva održanoj dana 28.01.2015. godine, ali usvajanje Elaborata nije pratilo donošenje Odluke o provedbi Elaborata te je neophodno da Gradsko vijeće Grada Sarajeva usvoji i predloženu Odluku.

Odluka se predlaže na razmatranje po skraćenom postupku, budući da se ne radi o složenom aktu, već se bliže uređuje postupak primjene važećeg gradskog propisa u primjeni usvojenog Elaborata.

PREDLOŽENA RJEŠENJA:

DIO PRVI - OPĆE ODREDBE - Ovom Odlukom uređuje se primjena „Elaborata o mogućim lokacijama za postavljanje spomenika, spomen-obilježja i spomen ploča na području Grada Sarajeva, a koji su od interesa za Grad Sarajevo“, kao i provođenje drugih neophodnih aktivnosti koje imaju za cilj određivanje lokacije spomeničkog sadržaja i idejno rješenje, a što je sadržaj postupka do donošenja odluke o podizanju spomenika, spomen-obilježja ili spomen ploče koji mogu biti u vidu skulpture, biste, spomen – kompleksa, odnosno obilježja, spomen česme, spomen ploče i fontane koji su svojim sadržajem, estetskim izgledom i funkcionalnošću namijenjeni očuvanju uspomena, historijskih događaja i ličnosti.

DIO DRUGI – INICIJATIVA ZA PODIZANJE SPOMENIKA, PRIMJENA ELABORATA, ODREĐIVANJE LOKACIJA, IDEJNO RJEŠENJE I ODLUKA O PODIZANJU SPOMENIKA

POGLAVLJE I. PODNOŠENJE I VALORIZACIJA INICIJATIVE -Ovo poglavlje definiše način podnošenja inicijativa za podizanje spomeničkog sadržaja, ovlaštene predstavnike koji imaju mogućnost podnijeti inicijativu, te sam sadržaj inicijative.

Utvrđen je postupak valorizacije inicijative putem Komisije za spomenike Gradskog vijeća, a po utvrđenom značaju spomenika, predviđena je javna debata kako bi se utvrdilo postojanje i važnost veze historijskog sadržaja ili ličnosti sa lokacijom na kojoj se inicira podizanje spomenika, potreba raspisivanja konkursa kao i mogući modeli finansiranja.

POGLAVLJE II. LOKACIJE ZA PODIZANJE SPOMENIKA IZ ELABORATA -U ovom poglavlju definiše se kada i na koji način se primjenjuje Elaborat.

Prema Elaboratu lokacije za podizanje spomenika podjeljena su u 3 nivoa važnosti. Lokacije koje su previđene za spomenike od značaja za Grad Sarajevo i Bosnu i Hercegovinu, spomenike od značaja za Grada Sarajevo, te od lokalnog općinskog značaja.

Propisano je obavezno raspisivanje konkursa za lokaciju od značaja za Grad Sarajevo i Bosnu i Hercegovinu.

POGLAVLJE III. LOKALCIJA ZA PODIZANJE SPOMENIKA KOJA NIJE SADRŽANA U ELABORATU - U ovom poglavlju definiše se postupak odabira lokacije ukoliko se ustanovi da je bitna veza predložene lokacije na kojoj se inicira podizanje spomenika, a takva lokacija nije predviđena u Elaboratu.

Previđeno je da Gradonačelnik, za spomenike od značaja za Grad Sarajevo i Bosnu i Hercegovinu, pribavi mišljenja općine na čijoj teritoriji se nalazi lokacija, Kantonalnog zavoda za zaštitu kulturno-historijskog i prirodnog naslijeđa, Zavoda za planiranje razvoja Kantona Sarajevo, a u slučaju da se lokacija nalazi u zoni zaštite nacionalnog spomenika i mišljenje Zavoda za zaštitu spomenika Federacije Bosne i Hercegovine.

Za podizanje spomenika od značaja za općinu na lokacijama koje nisu predviđene Elaboratom, neophodno je pribaviti mišljenja Kantonalnog zavoda za zaštitu kulturno-historijskog i prirodnog naslijeđa, Zavoda za planiranje razvoja Kantona Sarajevo, a u slučaju da se inicira podizanje spomenika na lokaciji koja se nalazi u zoni zaštite nacionalnog spomenika, neophodno je i mišljenje Zavoda za zaštitu spomenika Federacije Bosne i Hercegovine.

POGLAVLJE IV. IDEJNO RJEŠENJE ZA PODIZANJE SPOMENIKA - U ovom poglavlju obrađen je način izbora odgovarajućeg idejnog rješenja, odnosno predviđeno je da Gradonačelnik raspisuje konkurs za izbor odgovarajućeg idejnog rješenja spomenika, za spomenike od značaja za Grad Sarajevo i Bosnu i Hercegovinu.

Preciziran je sastav konkursne komisije, koju formira Gradonačelnik rješenjem, te osnovni sadržaj rješenja. Definiiran je i osnovni djelokrug komisije, te postupak do utvrđivanja konačnog prijedloga idejnog rješenja spomenika.

Za spomenike koji se podižu na lokacijama od značaja za Grad Sarajevo, Gradonačelnik je dužan u saradnji sa nadležnim institucijama i podnosiocem inicijative ili putem javnog, odnosno pozivnog konkursa, pribaviti odgovarajuće idejno rješenje spomenika.

Za lokacije od značaja za općine Grada Sarajeva, u ovom poglavlju je definisano da općina može zajedno sa podnosiocem inicijative pribaviti idejno rješenje raspisivanjem javnog ili pozivnog konkursa za izbor odgovarajućeg idejnog rješenja spomenika. Općina je dužna za spomenike za koji se inicira podizanje na lokaciji predviđenoj Elaboratom sa oznakom „općina“ ili na lokaciji odabranoj u konsultacijama sa nadležnim institucijama, pribaviti mišljenje o idejnom rješenju spomenika od Zavoda za zaštitu kulturno-historijskog i prirodnog naslijeđa Kantona Sarajevo i Zavoda za planiranje razvoja Kantona Sarajevo.

U ovom poglavlju je također, predviđena situacija u kojoj se, ukoliko na traženoj lokaciji ne postoje prostorne mogućnosti za postavljanje slobodnostojećeg trodimenzionalnog spomenika, a veza spomeničkog sadržaja sa lokacijom je bitna, može postaviti spomenik u vidu odgovarajuće spomen-ploče, na fasadu arhitektonskih objekata na traženoj lokaciji, s tim da Gradonačelnik ranije pribavlja mišljenje općine na čijoj teritoriji se nalazi lokacija, Zavoda za zaštitu kulturno-historijskog i prirodnog naslijeđa Kantona Sarajevo i Zavoda za planiranje razvoja Kantona Sarajevo, te Zavoda za zaštitu spomenika Federacije Bosne i Hercegovine u skladu sa zakonom.

POGLAVLJE IV. ODLUKA O PODIZANJU SPOMENIKA - Način pripreme odluke o podizanju spomenika je definisan u ovom poglavlju. Definisano je da Gradonačelnik nakon preciziranja lokacije i pribavljanja idejnog rješenja, tekst odluke o podizanju konkretnog spomenika upućuje Komisiji za spomenike na dalje postupanje. Odluka obavezno sadrži idejno rješenje spomenika, precizno određenu mikro lokaciju za podizanje spomenika, podatke o načinu finansiranja i rok za poduzimanje aktivnosti na podizanju spomenika, te podatke o nosiocu realizacije.

Nacrt odluke, na osnovu predloženog teksta odluke, utvrđuje Komisija za spomenike, te ga upućuje Gradskom vijeću na razmatranje, a poslije provedene javne rasprave, prema tekstu prijedloga odluke koji priprema Gradonačelnik, Komisija za spomenike utvrđuje prijedlog odluke i upućuje ga Gradskom vijeću na konačno odlučivanje.

U predloženoj odluci je navedena i dužnost podnosioca inicijative propisana Odlukom o spomenicima od značaja za Grad Sarajevo, a koja se odnosi na postupanje investitora po stupanju na snagu konkretne odluke o podizanju konkretnog spomenika za koji je podnesena inicijativa, podnese zahtjev za izdavanje urbanističke saglasnosti za podizanje spomenika nadležnom općinskom organu. Rok za ovu radnju je 60 dana, uz obavezu da se obavijesti i Gradonačelnik o ovoj aktivnosti.

Za mogućnost da podnosilac inicijative ne izvrši predhodno navedenu obavezu podnošenja zahtjeva za urbanističku saglasnost, predviđeno je da Gradonačelnik pokrene proceduru stavljanja van snage odluke Gradskog vijeća o podizanju konkretnog spomenika.

DIO TREĆI – ZAVRŠNE ODREDBE - U ovom poglavlju definisano je da će se ova odluka objaviti u „Službenim novinama Kantona Sarajevo“.

FINANSIJSKA SREDSTVA:

Za realizaciju ove Odluke planiraju se sredstva u Budžetu Grada Sarajeva